

■ REGENZA

Co vinavant suenter ils 9 da favrer?

(anr/gc) Ina dumonda ha occupà ier fitg tar l'inscunter mensil dals representants dals meds da massa cun la regenza: Co vai vinavant – spezialmain en il Grischun – suenter ch'il suveran svizzer ha acceptà ils 9 da favrer l'iniziativa cunter l'immigraziun da massa en Svizra? Surlonder na possian ins – tenor cuss. gov. *Hansjörg Trachsel*, schef dal departament d'economia – na dir anc bler. Tut dependia ussa da la lescha executorica ch'il cussegl federal haja da sutmetter al parlament. La regenza federala sa fatschentia dentant intensivamain cun questa nova situaziun.

In fatg saja mintgacas ch'il Grischun fissia pertutgà fitg da restricziuns sin ils secturs da sanadad, construcziun e dal turissem, siond qua il dumber dad occupads da l'exteriur fitg aut. Co quai sappia vegnir reglà cun in eventual statut da stagiunar u contingents restia tut avert. Da guardar saja dentant ch'ils chantuns da muntogna na vegnian betg dischavantagiads tar questa repartiziun visavi las grondas aglomeraziuns.

Segund cuss. gov. *Barbara Janom Steiner*, schefa dal departament da finanzas, s'occupian la conferenza dals chantuns



ed era da diverss departaments chantunals intensivamain cun la nova situaziun. Na dispartaivlas restian las bilaterals. Mo tut en tut saja tant malsegir. En curt vegnian ins a sa conferir surlonder cun il cussegl federal.

L'Uniun europea ha interrut – er en consequenza dal gea dals 9 da favrer – ils

discurs cun la Svizra pertutgant ina cunvegna davart il current electric. Ins speria – segund il parsura dal guvern, cuss. gov. *Mario Cavigelli* – dentant tuttina d'arivar ad ina schliaziun, siond la Svizra pertutgada fitg sin quel champ tant concernent producziun, vendita sco era pervia dals dretgs da passar cun conducts.